

গণপ্রজাতন্ত্রী বাংলাদেশ সরকার

জাতীয় রাজস্ব বোর্ড

[মূল্য সংযোজন কর ও সম্পূরক শুল্ক]

প্রজ্ঞাপন

তারিখ: ১৬ আষাঢ়, ১৪৩৩ বঙ্গাব্দ / ৩০ জুন, ২০২৬ খ্রিষ্টাব্দ।

এস.আর.ও. নং-২৬৪-আইন/২০২৬/৩৬৪-মুসক।—জাতীয় রাজস্ব বোর্ড, মূল্য সংযোজন কর ও সম্পূরক শুল্ক আইন, ২০১২ (২০১২ সনের ৪৭ নং আইন)-এর ধারা ৫৫, ৫৬, ৫৭, ৫৮, ৫৯, ৬০, ধারা ১২৬ এর উপ-ধারা (১) ও ধারা ১৩৫-এর সহিত পঠিতব্য, এ প্রদত্ত ক্ষমতাবলে, কাস্টমস আইন, ২০২৩ (২০২৩ সনের ৫৭ নং আইন) এর First Schedule এর Heading No. 24.01, 24.02, 24.03, 24.04 ও 85.43 এর আওতাধীন বাংলাদেশে উৎপাদিত বা আমদানিকৃত তামাক পণ্য এর আমদানি, উৎপাদন, বিপণন ও বাজারজাতকরণের উপর কার্যকর নিয়ন্ত্রণ ও পর্যবেক্ষণ এবং রাজস্ব সুরক্ষার লক্ষ্যে নিম্নরূপ বিধিমালা প্রণয়ন করিল, যথা:—

১। **শিরোনাম ও প্রবর্তন।**—(১) এই বিধিমালা তামাকজাত পণ্য আমদানি, উৎপাদন, বিপণন ও বাজারজাতকরণ নিয়ন্ত্রণ বিধিমালা, ২০২৬ নামে অভিহিত হইবে।

(২) এই বিধিমালা অবিলম্বে কার্যকর হইবে।

২। **সংজ্ঞা।**—বিষয় বা প্রসঙ্গের পরিপন্থি কিছু না থাকিলে, এই বিধিমালায়—

- (ক) “অনাপত্তি সনদ” বা “NOC” অর্থ এই বিধিমালার বিধি ৩ এর অধীন বোর্ড কর্তৃক জারীকৃত অনুমতিপত্র;
- (খ) “আইন” অর্থ মূল্য সংযোজন কর ও সম্পূরক শুল্ক আইন, ২০১২ (২০১২ সনের ৪৭ নং আইন);
- (গ) “উৎপাদনকারী” অর্থ আইনের অধীন নিবন্ধিত তামাকজাত পণ্য উৎপাদনকারী প্রতিষ্ঠান এবং চুক্তিভিত্তিক উৎপাদন প্রক্রিয়ায় স্বত্বাধিকারী প্রতিষ্ঠান এর অন্তর্ভুক্ত হইবে;
- (ঘ) “এআর (AR) ভিত্তিক শনাক্তকরণ ব্যবস্থা (Augmented Reality-based Identification System)” অর্থ এমন একটি ডিজিটাল নিরাপত্তা ও যাচাইকরণ ব্যবস্থা, যাহার মাধ্যমে মোবাইল ডিভাইস বা অন্যান্য ইলেকট্রনিক যন্ত্র ব্যবহার করিয়া তামাক বা তামাকজাত পণ্যের সত্যতা, ট্রেসেবিলিটি, কর পরিশোধের অবস্থা অথবা অন্যান্য প্রাসঙ্গিক তথ্য দৃশ্যমান, যাচাই বা প্রদর্শন করা যায়;
- (ঙ) “ওয়্যারহাউস” অর্থ কোনো স্থাপনা, ভবন, কক্ষ, স্থান বা সংরক্ষণাগার, যাহা নিজস্ব, ভাড়াকৃত, ইজারাকৃত বা অন্য কোনো বৈধ ব্যবস্থার অধীনে পরিচালিত হয় এবং যেখানে তামাক, তামাকজাত পণ্য, কাঁচামাল, প্যাকেজিং উপকরণ, ট্যাক্স স্ট্যাম্প, ব্যান্ডরোল বা সংশ্লিষ্ট অন্যান্য উপকরণ সংরক্ষণ, মজুদ, গ্রহণ, বিতরণ বা সরবরাহের উদ্দেশ্যে রাখা হয়;

- (ঢ) “কিউআর (QR) কোড (Quick Response Code)” অর্থ এমন একটি দ্বিমাত্রিক (two-dimensional) মেশিন-পাঠযোগ্য কোড, যাহাতে তামাক বা তামাকজাত পণ্যের উৎপাদন, আমদানি, কর পরিশোধ, ট্রেসেবিলিটি, সত্যতা যাচাই অথবা অন্যান্য প্রাসঙ্গিক তথ্য সংরক্ষিত থাকে এবং যাহা ইলেকট্রনিক ডিভাইসের মাধ্যমে স্ক্যান ও যাচাই করা যায়;
- (ছ) “খুচরা বিক্রেতা (Retailer)” অর্থ এমন কোনো ব্যক্তি, প্রতিষ্ঠান বা ব্যবসায়িক সত্তা, যিনি চূড়ান্ত ভোক্তার নিকট সরাসরি তামাক বা তামাকজাত পণ্য বিক্রয় করে;
- (জ) “বিধিমালা” অর্থ মূল্য সংযোজন কর ও সম্পূরক শুল্ক বিধিমালা, ২০১৬;
- (ঝ) “বোর্ড” অর্থ জাতীয় রাজস্ব বোর্ড;
- (ঞ) “ডিলার (Dealer)” অর্থ এমন কোনো ব্যক্তি, প্রতিষ্ঠান বা ব্যবসায়িক সত্তা, যিনি উৎপাদক, আমদানিকারক, পরিবেশক বা অন্য কোনো অনুমোদিত উৎস হইতে তামাক বা তামাকজাত পণ্য ক্রয় করিয়া নির্ধারিত এলাকায় বিক্রয়, বিতরণ বা সরবরাহ কার্যক্রম পরিচালনা করে;
- (ট) “ডিজিটাল ট্যাক্স আইডেন্টিফায়ার (Digital Tax Identifier)” অর্থ বোর্ড কর্তৃক নির্ধারিত কোনো স্বতন্ত্র (unique) ডিজিটাল শনাক্তকরণ নম্বর, কোড, চিহ্ন, টোকেন বা অনুরূপ ইলেকট্রনিক পরিচিতি, যাহা তামাক বা তামাকজাত পণ্যের কর পরিশোধ, উৎপাদন, আমদানি, সরবরাহ, ট্রেসেবিলিটি ও সত্যতা যাচাইয়ের উদ্দেশ্যে ব্যবহৃত হয়;
- (ঠ) “তামাকজাত পণ্য” অর্থ তামাক, তামাক পাতা বা উহার নির্যাস হইতে প্রস্তুতকৃত যেকোনো দ্রব্য, যাহা চোষণ বা চিবানোর মাধ্যমে গ্রহণ করা যায় বা ধূমপানের মাধ্যমে শ্বাসের সহিত টানিয়া লওয়া যায় বা অন্য কোনোভাবে সেবন করা যায় এবং বিড়ি, সিগারেট, চুরুট, গুল, জর্দা, খৈনী, সাদাপাতা, Nicotine Pouch, Heated Tobacco, ই-সিগারেট, ভেপার, সিগার, হক্লা বা পাইপের ব্যবহার্য মিশ্রণ (mixture) ইহার অন্তর্ভুক্ত হইবে;
- (ড) “পরিবেশক (Distributor)” অর্থ এমন কোনো ব্যক্তি, প্রতিষ্ঠান বা ব্যবসায়িক সত্তা, যিনি উৎপাদক বা আমদানিকারকের নিকট হইতে তামাক বা তামাকজাত পণ্য গ্রহণ করিয়া ডিলার, পাইকার, খুচরা বিক্রেতা বা অন্যান্য অনুমোদিত ক্রেতার নিকট বিতরণ বা সরবরাহ করে;
- (ঢে) “সরবরাহকারী” বা “বিপণনকারী” অর্থ উৎপাদনকারীর নিকট হইতে ক্রয়পূর্বক অথবা আমদানিপূর্বক তামাক পণ্য সরবরাহকারী বা বিপণনকারী বা উহার ডিলার বা ডিস্ট্রিবিউটর;
- (ণ) “Track and Trace” অর্থ তামাকজাত পণ্যের কৌচামাল সংগ্রহ হইতে শুরু করিয়া চূড়ান্ত খুচরা বিক্রয় পর্যন্ত প্রতিটি ধাপ পর্যবেক্ষণযোগ্য ও লিপিবদ্ধযোগ্য ডিজিটাল ট্র্যাকিং ব্যবস্থা।

৩। নতুন কারখানা স্থাপনে অনাপত্তি সনদ।—(১) তামাকজাত পণ্য উৎপাদনের লক্ষ্যে কারখানা স্থাপনের পূর্বে সংশ্লিষ্ট ব্যক্তি বা প্রতিষ্ঠান “পরিশিষ্ট-ক” অনুযায়ী বোর্ডের নিকট অনাপত্তি সনদ (NOC) এর জন্য আবেদন করিতে হইবে।

(২) বোর্ড আবেদন প্রাপ্তির ৩০ (ত্রিশ) কার্যদিবসের মধ্যে আবেদন যাচাই করিয়া সিদ্ধান্ত গ্রহণ করিবে।

(৩) অনাপত্তি সনদ প্রদানের পূর্বে বোর্ড নিম্নলিখিত বিষয়সমূহ বিবেচনা করিবে, যথা:—

- (ক) প্রস্তাবিত কারখানার ডিটেইলড লে আউট, সীমানা প্রাচীর ও অন্যান্য অবকাঠামো সংশ্লিষ্ট দলিলাদি;
- (খ) প্রতিষ্ঠানটির ট্রেড লাইসেন্স, TIN, লিমিটেড কোম্পানির ক্ষেত্রে আর্টিকেল অব মেমোরেন্ডাম;
- (গ) মেশিনারিজের তালিকা;
- (ঘ) পরিবেশ অধিদপ্তরের ছাড়পত্র;
- (ঙ) বোর্ড কর্তৃক নির্ধারিত অন্য কোন দলিলাদি।

(৪) বোর্ডের অনাপত্তি সনদ ব্যতিরেকে কোনো নতুন কারখানার জন্য ব্যবসায় সনাক্তকরণ সংখ্যা (BIN) এর আবেদন eVAT সিস্টেমে দাখিল করা যাইবে না।

(৫) বিদ্যমান তামাকজাত পণ্য উৎপাদনকারী প্রতিষ্ঠানের শাখা নিবন্ধন বা ইউনিট খোলার ক্ষেত্রে এই বিধান প্রযোজ্য হইবে না।

৪। লিফ প্রসেসিং ইউনিট, ডিপো/ওয়্যারহাউস ইত্যাদির ক্ষেত্রে নিবন্ধন গ্রহণ।—(১) তামাক পণ্যের উপর প্রযোজ্য মূল্য সংযোজন কর, সম্পূরক শুল্কসহ অন্যান্য শুল্ক করাদি কারখানা পর্যায়েই পরিশোধিত হয় বিধায় কোনো তামাক পণ্য উৎপাদনকারী প্রতিষ্ঠানের যে কোনো একটি উৎপাদনকারী কারখানা, লিফ প্রসেসিং ইউনিট, ডিপো/ওয়্যারহাউস ইত্যাদির মুসক নিবন্ধন একত্রে গ্রহণ করা যাবে অর্থাৎ এক্ষেত্রে ফরম মুসক-২.১ এ মূল কারখানার সাথে লিফ প্রসেসিং ইউনিট, ডিপো/ওয়্যারহাউস ইত্যাদি অন্তর্ভুক্ত করে মুসক নিবন্ধন গ্রহণ করা যাইবে।

(২) একই মালিকানাধীন কোন প্রতিষ্ঠানের একের অধিক (একই নামে বা ভিন্ন নামে) কারখানা, লিফ প্রসেসিং ইউনিট ডিপো ও ওয়্যারহাউস থাকলে উক্ত একই মালিকানাধীন পৃথক পৃথক মুসক নিবন্ধিত তামাকজাত পণ্য উৎপাদনকারী প্রতিষ্ঠান, লিফ প্রসেসিং প্রতিষ্ঠান, ডিপো বা ওয়্যারহাউস এর মধ্যে ‘পরিশিষ্ট-খ’ এ উল্লিখিত ফরমের মাধ্যমে মূল্য সংযোজন কর ও সম্পূরক শুল্ক হার শূন্য শতাংশ উল্লেখপূর্বক উপকরণ, যন্ত্র এবং যন্ত্রাংশ আদান-প্রদান করা যাবে।

৫। সর্বোচ্চ খুচরা মূল্যে পণ্য বিক্রয়।—(১) তামাক পণ্যের স্থানীয় সরবরাহ পর্যায়ে সর্বোচ্চ খুচরা মূল্যের উপর প্রযোজ্য হারে উৎপাদনস্থল হতে সরবরাহের সময় মূল্য সংযোজন কর ও সম্পূরক শুল্ক পরিশোধ করিতে হইবে এবং সর্বোচ্চ খুচরা মূল্যের অধিক মূল্যে কোনো পর্যায়েই তামাকজাত পণ্য বিক্রয় করা যাইবে না। উৎপাদনস্থল হতে যে মূল্যের উপর মূল্য সংযোজন কর ও সম্পূরক শুল্ক পরিশোধ করা হইয়াছে সেই মূল্য অপেক্ষা অধিক মূল্যে তামাকজাত পণ্য সরবরাহ করা হইলে উক্ত অধিক মূল্যের উপর মূল্য সংযোজন কর ও সম্পূরক শুল্ক প্রযোজ্য হইবে।

(২) তামাকজাত পণ্য উৎপাদনকারী নিজস্ব বা ভাড়াকৃত ওয়ারহাউজ হইতে বা তামাকজাত পণ্যের ডিলার বা ডিস্ট্রিবিউটার সর্বোচ্চ খুচরা মূল্য অপেক্ষা অধিক মূল্যে তামাকজাত পণ্য সরবরাহ করিলে উৎপাদনকারীকে উক্ত অধিক মূল্যের উপর প্রযোজ্য হারে মূল্য সংযোজন কর ও সম্পূরক শুল্ক প্রদান করিতে হইবে।

(৩) কোন খুচরা বিক্রেতা (Retailer) সর্বোচ্চ খুচরা মূল্য অপেক্ষা অধিক মূল্যে তামাকজাত পণ্য বিক্রয় করিলে, খুচরা বিক্রেতা উক্ত অধিক মূল্যের উপর প্রযোজ্য হারে মূল্য সংযোজন কর ও সম্পূরক শুল্ক পরিশোধে বাধ্য থাকিবে।

৬। **উপকরণ সংগ্রহ।**— (১) তামাক প্রসেসিং ইউনিট হইতে পণ্যের বিনিময়ে কোনো ব্যক্তি বা প্রতিষ্ঠান অপ্রক্রিয়াজাত তামাক স্থানীয়ভাবে বিক্রয়ের ক্ষেত্রে আইনের ধারা ১৫ এর উপ-ধারা (৩) এর শর্তাংশ অনুযায়ী তৃতীয় তফসিলে উল্লিখিত প্রতি কেজি ৫০ টাকা হারে সুনির্দিষ্ট কর প্রদান করিতে হইবে।

(২) কৃষক এর নিকট হতে কাঁচা তামাক ক্রয়ের ক্ষেত্রে এবং তামাকজাত পণ্য রপ্তানিকারক প্রতিষ্ঠান ও উৎপাদনকারী প্রতিষ্ঠানের নিজস্ব তামাক প্রসেসিং ইউনিট হইতে অপ্রক্রিয়াজাত তামাক স্থানীয়ভাবে সংগ্রহের ক্ষেত্রে সুনির্দিষ্ট কর আরোপিত হইবে না।

(৩) তামাকজাত পণ্যের যে সকল উপকরণের উপর উৎপাদন পর্যায়ে সম্পূরক শুল্ক আরোপিত রহিয়াছে (যেমন: বিড়ি পেপার, সিগারেট পেপার, ইত্যাদি) এইরূপ উপকরণ, উৎপাদনকারী প্রতিষ্ঠান ব্যতীত ভিন্ন কোন ব্যক্তি বা প্রতিষ্ঠান বা ট্রেডারের নিকট সরবরাহ বা বিক্রয় করা যাইবে না।

(৪) সম্পূরক শুল্ক আরোপিত রহিয়াছে এরূপ তামাকজাত পণ্যের উপকরণ (যেমন: বিড়ি পেপার, সিগারেট পেপার, ইত্যাদি) উৎপাদনকারী প্রতিষ্ঠান মাস ভিত্তিক উৎপাদন ও বিপণনের তথ্য “পরিশিষ্ট-গ” অনুযায়ী সংশ্লিষ্ট ভ্যাট কমিশনারেট এবং নিরীক্ষা, গোয়েন্দা ও তদন্ত অধিদপ্তর, মূল্য সংযোজন কর, ঢাকা বরাবরে প্রেরণ করিবেন।

(৫) তামাকজাত পণ্য উৎপাদনকারী প্রতিষ্ঠান বা তাদের মনোনীত চুক্তিভিত্তিক উৎপাদনকারী ব্যতীত ভিন্ন কোন ব্যক্তি, প্রতিষ্ঠান বা ট্রেডার সম্পূরক শুল্ক আরোপিত রহিয়াছে এরূপ তামাকজাত পণ্যের উপকরণ (যেমন: বিড়ি পেপার, সিগারেট পেপার, এ্যাসিটেট টো, ফিল্টার, ইত্যাদি) আমদানি করিতে পারিবে না।

৭। **উপকরণ, যন্ত্র, যন্ত্রাংশ স্থানান্তর এবং উৎপাদিত পণ্য সরবরাহ।**—(১) কোনো উৎপাদনকারী প্রতিষ্ঠানের ইউনিটসমূহের (উৎপাদনকারী কারখানা, লিফ প্রসেসিং ইউনিট, ডিপো/ওয়ারহাউস) মধ্যে ‘পরিশিষ্ট-খ’ এ উল্লিখিত ফরমের মাধ্যমে মূল্য সংযোজন কর ও সম্পূরক শুল্ক হার শূন্য শতাংশ উল্লেখপূর্বক উপকরণ, যন্ত্র এবং যন্ত্রাংশ আদান-প্রদান করা যাইবে।

(২) লিফ প্রসেসিং ইউনিট, ডিপো/ওয়ারহাউস ইত্যাদি ইউনিটসমূহের অনুকূলে কোনো সরবরাহ গ্রহণের ক্ষেত্রে উৎসে মুসক কর্তন প্রযোজ্য হলে সংশ্লিষ্ট তামাক পণ্য উৎপাদনকারী কর্তৃক কারখানার মুসক নিবন্ধনের বিপরীতে উক্ত উৎসে মুসক কর্তন করিতে হইবে।

(৩) তামাক পণ্যের উপর প্রযোজ্য শুল্ক-করাদি যেহেতু উৎপাদন পর্যায়েই আদায় হইয়া থাকে সুতরাং একই মালিকানাধীন একাধিক কারখানার পণ্য উক্ত মালিকানাধীন প্রতিষ্ঠানের যে কোনো ডিপো/ওয়্যারহাউসের মাধ্যমে বাজারে সরবরাহ করা যাইবে।

(৪) যে কোনো কারখানার মূসক নিবন্ধনের মধ্যে বন্ডেড ওয়্যারহাউস অন্তর্ভুক্ত থাকিলে বন্ড সংশ্লিষ্ট কর্তৃপক্ষ কর্তৃক জারীকৃত শর্তাবলি পরিপালন সাপেক্ষে উক্ত বন্ডেড ওয়্যারহাউসে রক্ষিত ইন-বন্ডকৃত উপকরণ শুল্ক-করাদি পরিশোধ করিয়া এক কারখানা হইতে অন্য কারখানায় ‘পরিশিষ্ট-ক’ এ উল্লিখিত ফরমের মাধ্যমে মূল্য সংযোজন কর ও সম্পূরক শুল্ক হার শূন্য শতাংশ উল্লেখপূর্বক সরবরাহ করা যাইবে;

৮। **বিতরণকারী নিবন্ধন।**—(১) প্রতিটি উৎপাদনকারী তাহার নিজস্ব মালিকানায় বা নিয়ন্ত্রণে রয়েছে এইরূপ সকল ওয়্যারহাউজ, ডিলার ও ডিস্ট্রিবিউটরের নাম, ঠিকানা ও ব্যবসায় সনাক্তকরণ সংখ্যা সংশ্লিষ্ট মূসক কমিশনারেট-এ দাখিল করিবে।

৯। **ট্যাক্স স্ট্যাম্পের প্রযুক্তিগত বৈশিষ্ট্য।**—বোর্ড, সময় সময় প্রযুক্তিগত উন্নয়ন ও আন্তর্জাতিক সর্বোত্তম চর্চার আলোকে তামাকজাত পণ্যের জন্য ট্যাক্স স্ট্যাম্প, ব্যান্ডরোল, ডিজিটাল ট্যাক্স আইডেন্টিফায়ার, কিউআর (QR) কোড, অগমেন্টেড রিয়েলিটি (AR) ভিত্তিক শনাক্তকরণ ব্যবস্থা অথবা অনুরূপ অন্য কোনো প্রযুক্তির নকশা, আকার, প্রযুক্তিগত বৈশিষ্ট্য, মুদ্রণ, সরবরাহ, ব্যবহার, প্রয়োগ ও যাচাইকরণ পদ্ধতি নির্ধারণ করিতে পারিবে এবং এই বিষয়ে প্রয়োজনীয় নির্দেশনা, নীতিমালা বা আদেশ জারি করিতে পারিবে, আমদানিকৃত তামাকজাত পণ্যের ক্ষেত্রেও বোর্ড উক্ত প্রযুক্তির প্রযোজ্যতা নির্ধারণ করিতে পারিবে।

১০। **ডিজিটাল ব্যবস্থা প্রণয়ন।**—বোর্ড, সময় সময়, নিম্নোক্ত ডিজিটাল ব্যবস্থা প্রণয়নসহ অন্য যেকোনো অত্যাধুনিক ডিজিটাল ব্যবস্থা প্রণয়নের নীতি নির্ধারণ করিতে পারিবে, যথা:-

- (ক) কেন্দ্রীভূত ডিজিটাল ট্র্যাক অ্যান্ড ট্রেস সিস্টেম পরিচালনা, যাহার মাধ্যমে কাঁচামাল সংগ্রহ হইতে শুরু করিয়া চূড়ান্ত খুচরা বিক্রয় পর্যন্ত সমগ্র সরবরাহ শৃঙ্খল পর্যবেক্ষণ করা যাইবে;
- (খ) তামাক পণ্যের উৎপাদন ও সরবরাহ স্বয়ংক্রিয় ও কেন্দ্রীয়ভাবে পর্যবেক্ষণ করিবার লক্ষ্যে কারখানায় counting device সহ অত্যাধুনিক এআই ক্যামেরা স্থাপন;
- (গ) তামাকজাত পণ্যের ক্ষেত্রে QR/AR Code স্থাপন;
- (ঘ) বাজার পর্যবেক্ষণের জন্য একটি বিশেষ মোবাইল অ্যাপ্লিকেশন চালু, যাহার মাধ্যমে নাগরিকগণ অবৈধ সিগারেট সম্পর্কে জাতীয় রাজস্ব বোর্ডকে তথ্য প্রদান করিতে পারিবে;
- (ঙ) চোরাচালান কিংবা অবৈধ সিগারেটের তথ্য যথাযথ কর্তৃপক্ষকে জানানোর জন্য হইসেললোয়ার সিস্টেম চালু এবং এই ব্যবস্থার আওতায় সঠিক তথ্যদাতাকে পুরস্কৃত করার বিধান প্রণয়ন।

১১। **সার্বক্ষণিক তদারকি।**—(১) বোর্ড, সকল তামাকজাত পণ্য উৎপাদনকারী, আমদানিকারক, ডিলার ও ডিস্ট্রিবিউটর প্রতিষ্ঠানকে সার্বক্ষণিক ও নিবিড় মনিটরিং এবং রাজস্ব আদায় তদারকি করার লক্ষ্যে একটি নির্দিষ্ট মূসক কমিশনারেট নির্বাচন করিতে পারিবে।

গণপ্রজাতন্ত্রী বাংলাদেশ সরকার
জাতীয় রাজস্ব বোর্ড

নতুন তামাকজাত পণ্য কারখানা স্থাপন/ব্যবসায় সনাক্তকরণ সংখ্যা প্রাপ্তির জন্য অনাপত্তি সনদের
আবেদনপত্র

[বিধি ৩, বিধি ৭(৪) দ্রষ্টব্য]

১। আবেদনকারীর নাম ও আইনি সত্তা:	
২। নিবন্ধিত ঠিকানা:	
৩। প্রস্তাবিত কারখানার অবস্থান:	
৪। প্রস্তাবিত উৎপাদন ক্ষমতা (বার্ষিক):	
৫। বিনিয়োগের পরিমাণ:	
৬। যোগাযোগের নম্বর / ইমেইল:	
৭। সংযুক্ত দলিলাদির তালিকা:	(ক) ট্রেড লাইসেন্স / ইনকর্পোরেশন সার্টিফিকেট (খ) জমির দলিল বা লিজ চুক্তি (গ) পরিবেশ ছাড়পত্র (ঘ) প্রজেক্ট প্রোফাইল (ঙ) বোর্ড কর্তৃক চাহিত অন্যান্য দলিলাদি।

আমি, এই মর্মে ঘোষণা করিতেছি যে, উপর্যুক্ত সকল তথ্য সত্য ও সঠিক এবং আমি এই
বিধিমালার সকল বিধান মানিয়া চলিতে বাধ্য থাকিব।

তারিখ:	আবেদনকারীর স্বাক্ষর ও সিল
--------------	---------------------------

পরিশিষ্ট 'খ'

তামাকজাত পণ্য উৎপাদনকারী প্রতিষ্ঠানের উপকরণ, যন্ত্র ও যন্ত্রাংশ স্থানান্তরের জন্য ফরম
[বিধি ৪(২), বিধি ৭(১) দ্রষ্টব্য]

প্রতিষ্ঠানের নাম:

প্রতিষ্ঠানের বিআইএন:

প্রেরণকারী ইউনিট/শাখা/পণ্যগারের নাম ও ঠিকানা:

গ্রহীতা ইউনিট/শাখা/পণ্যগারের নাম ও ঠিকানা:

চালান নম্বর:

ইস্যুর তারিখ:

ইস্যুর সময়:

ক্রমিক নং	উপকরণ/যন্ত্র/ যন্ত্রাংশের নাম	পরিমাণ	কর ব্যতীত মূল্য	প্রযোজ্য করের হার ও পরিমাণ	মন্তব্য
(১)	(২)	(৩)	(৪)	(৫)	(৬)

দায়িত্বপ্রাপ্ত ব্যক্তির নাম:

পদবি:

স্বাক্ষর:

সিল:

ই-মেইল:

ফোন নাম্বার:

তারিখ:	নিবন্ধিত উৎপাদনকারীর স্বাক্ষর ও সিল
--------------	-------------------------------------

বিড়ি পেপার, সিগারেট পেপার উৎপাদনকারী প্রতিষ্ঠানের বিড়ি পেপার, সিগারেট পেপার
উৎপাদন এবং সরবরাহের তথ্য সংক্রান্ত ফরম
[বিধি ৬(৪) দ্রষ্টব্য]

সরবরাহকারী প্রতিষ্ঠানের নাম:
সরবরাহকারী প্রতিষ্ঠানের বিআইএন:
সরবরাহকারী প্রতিষ্ঠানের ঠিকানা:

ক্রমিক নং	পণ্যের নাম	সরবরাহের পরিমাণ (কেজি)	সরবরাহ গ্রহণকারী প্রতিষ্ঠানের নাম, ঠিকানা, BIN
(১)	(২)	(৩)	(৪)

দায়িত্বপ্রাপ্ত ব্যক্তির নাম:
পদবি:
স্বাক্ষর:
সিল:
ই-মেইল:
ফোন নাম্বার:

তারিখ:	নিবন্ধিত উৎপাদনকারীর স্বাক্ষর ও সিল
--------------	-------------------------------------

জাতীয় রাজস্ব বোর্ডের আদেশক্রমে

মোঃ আবদুর রহমান খান এফসিএমএ
চেয়ারম্যান।